

Desaroyando nos agentenan policial

Polis di Aruba y Corsou a participa na curso di siguridad di bom

CUERPO Policial Aruba ta keda inverti continuamente den su polisnan cu diferente cursonan pa fortalece nos Cuerpo.

Esaki ta e vision cu Altocomisario Ramon Arnhem tin, dor di inverti constantemente den e agentenan policial cu cursonan pa asina nos Cuerpo ta bon entrena riba diferente materia.

Recientemente 6 polis di Cuerpo Policial Aruba y 2 di Cuerpo Policial Corsou a forma parti di e curso di Verkenner CBRN Explosievenveiligheid.

E curso a wordo organisa y duna dor Defensa Hulandes. Despues di un curso basta intensivo tur polis di KPA y di KPC a logra pasa nan examen cu exito.

Den presencia di altocomisario interino Gordon cada cursista a hayanan certificado.

Cuerpo Policial Aruba ta felicita nos coleganan policial pa nan trabou duro y esfuerzo como tambe ta orguyoso di cada un di nan.



Partido AVP

Parlamentario Sonaly Fernandez Acosta ta continua cu su lucha for di Ministerio di Asunto Social

DESPUES di cinco luna intensivo y di aprendisahe como miembro activo di Parlamento di Aruba, Sra. Sonaly Fernandez Acosta ta anuncia di ta tuma un paso nobo como parti di su compromiso na e comunidad di Aruba. Pa prome di juni 2025, Sonaly lo sigui eherce su trabao como consehero strategico di Minister di Asuntonan Social den Gabinete AVP/FUTURO.

"Tabata sigur un gran honor di por a representa pueblo di Aruba como miembro di Parlamento. E experiencia aki a duna mi hopi claridad riba e proceso parlamentario y e necesidadnan di nos comunidad. Tambe a pone mi refleha unda mi por contribui di un manera mas fuerte cu e pasion y experiencia cu mi tin," segun Sra. Fernandez Acosta.

E transicion aki ta un decision personal basa riba Sonaly su motivacion principal pa drenta e arena politico.

E mision, particularmente ta enfoca riba e sector di social, entre otro, sosten pa e gruponan di mas vulnerabel den nos sociedad. Den e encargo nobo, Sonaly lo por traha mas cerca y ehecuta

cambionan cu tin impacto profundo riba nos comunidad.

"Mi mision semper tabata pa trece cambio positivo unda e ta mas necesario. For di e encargo nobo aki, mi ta sinti cu mi por yega mas cerca di e realidad di nos comunidad y purba duna forma na solucion concreto" segun Sra. Fernandez Acosta.

Sra. Fernandez Acosta ta gradici su coleganan den Parlamento y tur su votadonan cu a dun'e nan sosten y confiansa. Sonaly lo sigui entrega su mes pa un Aruba mas husto y inclusivo cu e mesun pasion y dedicacion cu semper el a bin ta haci.

